

桑

蓬

集

全



小川

琢治

叙

桑弧蓬矢固是男子之志雪泥鴻爪何非丈夫之常
壯歲學宦比年講肄之暇騁目裔土放心藝林得詩
凡五十又六首今將乞骸退休急宜搜輯附之手民
貽諸友好聊以志蹤迹豈言供臥遊昭和五年庚午
五月望日小川琢治誌

盡交飛鳥鷺夢驚頻

大溝近藤正齋先生墓下作

大正壬子十月
奉告贈位祭日

好卜墓田湖水頭青松黃葉滿山秋洛陽才子文章
在不用生封萬戶侯

北海屠鯨意氣壯百年傲骨惜潛光今朝雨露滋衰
草聖代論功第一藏

豐後道中口吟

癸丑

十年邊塞老風塵輸却漢庭巧宦人射虎南山非我
事遍尋石佛入荆榛

明光浦上吟二首

乙卯

危巖轟轟海灣開遙見層巒翠作堆聖帝駐鑿失碑
碣賢侯營墅有樓臺揭簾共酌三杯酒吹帽空思七
步才風景依稀多古意望潮閣下暮潮來
重宿城南玉女祠一灣風景曉尤奇迎潮藻水開明
鏡帶靄草山描翠眉可喜海鄉鱸已美休論華表鶴
歸遲今朝嘯傲閒遊足振袂此心鷗獨知

金州獲三葉蟲僵石喜賦

丙辰

無乃女媧餘補天不關滄海變桑田依然神物存殘
甲三葉形全萬萬年

會飲燕京泰豐樓

故人延我上高樓置酒勸杯話昔游煙樹河山皆舊
識薊門猶記七年秋

發燕京

薊山黛色接空浮雁影低迷萬里秋匹馬黃金臺下
路不堪回首向并州

中秋夜再渡黃河

十年鴻雪復經過指顧平蕪感慨多未識重遊何似
此秋風明月渡黃河

般陽翼經書院

鄭康成讀書地有元明碑

槐柳蕭疎一路通曬書臺上夕陽紅祠邊老栢亭亭

在識否先生道更東

般陽秋懷

繞舍合歡霜葉稀秋深溜上雁南飛登高不是茱萸
客休怪久游未語歸

贈聖圓上人

不說世間行路難般陽相遇且披肝知師自解降魔
呪南海毒龍一指彈

北京途上

丙辰再航青嶋從齊入燕

北去濟河路幾程曠原樹色帶烟橫風寒渤海連津
口雪壓薊山擁朔城猶憶雕鞍壚下醉曾經長劍匣

中鳴卽今方是升平日不要書生敢乞纓

連日衝寒採訪石佛作丁巳

薊北雪塵紛似沙飛翻地上趁奔車海東游子寒侵
骨重褐去尋售佛家

青嶋竹枝四首節一

水鎖埠頭船去遲淡粧相送問來期客言應及三春
老滿嶋櫻花歷亂時

郭忠恕摹輞川圖

詩格右丞天下無風流更畫輞川圖清源寺廢亡眞
蹟剩得洛陽醉客摹

淄川客舍贈某女史

回首燕城幾劫塵相逢話舊別燈頻當年交友凋零
盡却認岐王宅裡人

飛行機

不是仙人騎鶴昇機聲嘎嘎入雲層齊諧畢竟何須
怪目睹南溟搏翼鵬

西湖

湖上峰巒畫不如扁舟載酒入芙蓉煙中認得名姝
墓月下尋來處土廬獨見丹青雄志在空留金券燼
灰餘休論今古興亡事九土眼前龍虎拏

西湖雜詠 六首節四

十里長堤萬頃荷香風吹送采蓮歌繫舟蘇小墳邊

柳料得月明此處多

泛舟

晴好雨奇風景殊一游兼賞足清娛李家金碧方看

盡更對南宮潑墨圖

遇雨

百丈浮圖插半天濛濛水色月如煙料知他日西湖

夢應落孤山梅柳邊

新新旅館在寶俶塔下前對孤山

來尋吳越王家迹石佛不言山寂寂風拂深林露散

珠奔溪嚙壑殊清激

靈隱寺

秦淮 二首節一

六代興亡似易棋游人獨記牧之詩無風無月秦淮

水猶見輕煙罩柳枝

金陵懷古

石頭城對雨花臺陳迹依稀幾劫灰漱玉山空血長

結埋香湖在夢難回行看二水成陵谷已見六朝埋

草萊暮靄蒼茫殘堞上天邊日落大江來

襟帶居然開畫圖秣陵形勝帝王區水連吳楚天吞

吐地隔江淮山有無烏巷南通桃葉渡白門西去莫

愁湖奈何金氣今銷盡擊楫中流人物虛

登金山寺塔

螺旋高上逼金樞江北山河有似無遙見飛禽天際
沒揚州指得一浮圖

楓橋

姑蘇城外草茸茸夾水萬株柳色濃日暮寒山寺邊
路楓橋東去怕聽鐘

淄河

誰記當年呂與田臨淄城外草芊芊村童來牧齊王
墓處處牛羊負日眠

題趙伯駒山莊避暑圖

構閣層山裏朱欄枕水湄飛泉清碎玉高柳綠垂絲

林擁雲烟起谿盤魚鳥嬉仙寰難造詣塵境苦奔馳
偶對丹青美堪鑿心力疲人生丘壑興縱適竟何時

題韓幹三馬圖九首并引節六

戊午正月臥病於青嶋客舍有售古畫馬圖者
披而觀之上題唐韓幹圍獵圖宣和鑒定十字
并有菁字華押鈐德壽宮印白文小方印右上
隅鈐宣德殿寶朱文大方印題字書體所謂瘦
金蓋宣和府中舊物經思陵題款後入明內府
而偶落於人間者也題款朱墨皆帶古色縑素
多破壞色亦黝暗而筆墨分明色彩略完所畫

人馬眉目鬣尾可分毫髮雖未必爲眞蹟的是
千年以上之物似可以窺龍眠吳興所規摹余
生庚午今逢戊午而偶獲此畫欣喜不禁得絕

句九首

偶逢眞馬馬年初不是潮橋踏雪驢歷歷墨光猶認
得臨安天子瘦金書

伯樂不過冀北野駒駝老盡櫪槽下欲求駿骨苦無
由只買百金韓幹馬
將軍獨續建安才擗管傳神生面開門下青藍一人
在停勻骨肉寫龍媒

千歲偶傳韓幹圖彩毫奕奕畫閑駒人間難續廣陵
散堪笑魏公費仿摹
天矯三馬共龍躡蹄起颯風眼發芒畫史苦心豈形
似驪黃之外識眞良
毫端寫出眞奇駿認得臨風霜鬣振伏櫪未忘千里
心鐵蹄欲直陷堅陣

題板橋墨竹圖

鳳毛含露絕埃塵數幹琅玕玉色新看取高人成竹
意虛心勁節是精神

登六甲山 二首 戊午

白雲來去水奔流一徑羊腸山壓頭山上別開天地
在涼颯滿袖氣如秋

海鳴微茫翠未分天邊仙籟萬松間今朝始覺山居
樂下瞰塵寰隔白雲

送武內中將出征兼呈某大將

戊午

松漠風雲勞六師弄兵潢水是爲誰將軍旄出山河
動候騎蹄飛草木披耀武何須月支首紀功當勒燕
然碑白狼山外催秋早莫使轅門報捷遲

航西船中作

戊午孟冬再遊歐洲

曾游倏忽廿星霜復駕樓船萬里浪豈學魯叟浮海

意欲探漢將鑿空疆麒麟樹血每朝熱鮫女淚珠通
夜光銅柱之西師子鳴信風送我抵天方

香山

成蓋棕欄連理榕女皇山下不知冬攀躋自有升天
索飛上妙香第一峰

巴里

鴻迹回頭歲月遐亂餘猶認舊繁華長春巷上車如
水不夜城中人似花

伯林途上作

北海風濤雲未除伯林春柳眼難舒征人不是請纓

者欲購枋頭幾卷書

望少女峰

山色水光隨處宜爭如此地最清奇夕陽少女峰頭
雪描出薔薇紅一枝

題櫻嶼圖

河村教授癸丑元旦試筆

劫後海南第一山仙峯幾度夢中攀謝君油績描真
相使我臥游堆翠間

東鄉湖

甲子

東湖豈讓浙西湖湖畔溫泉天下無唯少畫師如老
雪平岡好處補浮圖

欲卜宅鳴涯不遂戲賦寄木戶學士

乙丑

對洛翠鬢卅六峯風光宛似美人容不能卜宅隣松
菊朝夕臥聽長樂鐘

送王將軍

步留別韵

瀛海乘槎來問津棹回不復與鷗親明年花發東山
夕月下含杯缺一人

哭王靜庵

步豹軒博士韵

茫茫西土沒煙塵壯烈傳來泣鬼神齊邑猶存王蠋
節首陽長見伯夷仁棄捐彝典何温古阿附世情徒
闕新致祭游魂增景仰文山以後獨斯人

卽位式 戊辰

瑞氣熊熊滿禁城
曉開閭闔會簪纓
翩翩五采旌旗影
肅肅千官劍珮聲
雒邑曾聞冠冕盛
漢宮今識綬章榮
聖朝不戮防風氏
六合一同鳳鳥鳴

大饗

高會欲輕漢栢梁
丹楹絳帳夜煌煌
烏冠龍笛知林邑
雕甲畫戈想李唐
鳳鳥臨筵分鬱載
貂裘列序引杯觴
寵榮何獨金莖露
更賜秋英天上香

恭仁山莊

庚午春日陪雨山君山兩先生訪湖南先生次

雨山先生韵呈主人

城外幽棲地
田間耕讀人
清標同水潔
真性樂山仁
林鳥方呼霽
野花好弄春
從遊饒逸興
濯盡組纓塵

罷官自述

甲子重逢乞此身
聖朝雨露一家春
廣川園裏藿葵老
彭澤門前楊柳新
看劍莫嗟無所用
有書可讀未全貧
退居占得閒天地
隔絕康衢駟馬塵

言志

庭長蒿萊久不鋤
杜門謝客子雲居
無心還有關心事
欲讀平生未讀書

昭和五年五月二十三日印刷
昭和五年五月二十七日發行

〔非賣品〕

著者兼
發行者

小川 琢 治

印刷者

京都市上京區寺町今出川上ル

内外出版印刷株式會社

代表者 須磨勘兵衛
京都市下京區西洞院通七條南一